

UCAPAN ALUAN

**YANG BERUSAHA EN. HAMZAH BIN HJ. MOHAMAD
PENGARAH JABATAN ALAM SEKITAR NEGERI SARAWAK
DI**

**MAJLIS PERASMIAN SAMBUTAN HARI ALAM SEKITAR NEGARA
PERINGKAT NEGERI SARAWAK TAHUN 2020**

**31 OKTOBER 2020 (SABTU)
INSTITUT PENDIDIKAN GURU KAMPUS TUN ABDUL RAZAK, KOTA
SAMARAHAN**

SALUTASI

Selamat Pagi Dan Salam Sejahtera,

1. Terlebih dahulu saya memanjatkan rasa syukur yang tidak terhingga kerana pada hari ini dengan izin dan limpah kurniaNYA dapat kita berkumpul di Majlis Perasmian Sambutan Hari Alam Sekitar Negara Peringkat Negeri Sarawak Tahun 2020
2. Saya juga ingin mengambil kesempatan ini untuk mengalu-alukan kehadiran Yang Berusaha Tuan Haji Brahim Lumpu, Residen Bahagian Samarahan kerana sudi meluangkan masa bersama-sama kita sekaligus akan menyempurnakan majlis perasmian pada hari ini.
3. Saya ingin merakamkan ucapan terima kasih dan penghargaan kepada syarikat Trienekens (Sarawak) Sdn. Bhd dan pihak Institut Pendidikan Guru Kampus Tun Abdul Razak, Kota Samarahan, atas kerjasama untuk bersama-sama menjayakan program pada kali ini.

4. Kehadiran tuan-tuan dan puan-puan sekalian menunjukkan sokongan, semangat dan komitmen dalam menjayakan segala program yang dirancang oleh kerajaan melalui Jabatan Alam Sekitar dalam isu penjagaan alam sekitar. Harapan saya agar maklumat dan pengetahuan yang diperolehi akan dapat dikongsi bersama dengan keluarga, rakan-rakan, serta masyarakat.

Tuan-tuan dan Puan-Puan sekalian
Sambutan Hari Alam Sekitar Negara

5. Hari Alam Sekitar Negara yang jatuh pada 21 Oktober setiap tahun dengan tema 'Alam Sekitar Tanggungjawab Bersama' merupakan satu penjenamaan semula dan inisiatif penambahbaikan daripada penganjuran Minggu Alam Sekitar Malaysia pada tahun-tahun sebelum ini. Sambutan Hari Alam Sekitar Negara pada hari yang istimewa ini bertujuan untuk mengajak seluruh masyarakat agar sama-sama meraikan semangat kecintaan kepada alam sekitar.
6. Bersempena dengan Sambutan Hari Alam Sekitar Negara Peringkat Negeri Sarawak Tahun 2020, Jabatan Alam Sekitar Negeri Sarawak dengan kerjasama Syarikat Trienekens (Sarawak) Sdn.Bhd. telah mengadakan pelbagai program seperti Pertandingan Kuiz Radio, Pertandingan Mewarna bersama murid-murid Tabika Kemas sekitar Bandaraya Kuching dan Samarahan, Pertandingan Reka Cipta Video Alam Sekitar dan Pertandingan Reka Cipta Bahan Baru Daripada Bahan Buangan (*Creating new out of old*) di kalangan pelajar dari Community Based Rehabilitation Center Kuching, CBR (Social Welfare council of Sarawak).

7. Selain itu, sempena Sambutan Hari Alam Sekitar Negara Peringkat Negeri Sarawak Tahun 2020, Jabatan Alam Sekitar Negeri Sarawak juga telah mengadakan dan merancang beberapa program iaitu:-
- a. Program "HASN Virtual Run 2020" dengan kerjasama Sarawak Energy Berhad iaitu aktiviti larian maya bebas sejauh 7km dengan cara norma baru, dimana jua peserta berada bersesuaian dengan Perintah Kawalan Pergerakan Pemulihan (PKPP) dan mengikut Prosedur Operasi Standard ditetapkan. Program adalah terbuka kepada orang awam. Peserta telah mendaftar secara online dan tempoh larian bermula 17 Ogos sehingga 4 September 2020;
 - b. Program "HASN – Tahukah Anda?" yang juga merupakan kerjasama dengan Sarawak Energy Berhad di mana temubual dengan beberapa responden yang terdiri daripada orang awam telah dijalankan bagi mengetahui pengetahuan mereka mengenai sambutan Hari Alam Sekitar Negara serta bertujuan mewar-warkan sambutan Hari Alam Sekitar Negara kepada orang awam. Promosi kempen hindari plastik sekali guna turut dilaksanakan semasa program ini.

- c. Kempen Pengumpulan Buangan Elektrikal Dan Elektronik dengan kerjasama Syarikat GVE Strategic Waste Sdn. Bhd. yang telah diadakan pada 3 Oktober 2020 di Metro City Matang. Sebanyak 35MT Buangan Elektrikal Dan Elektronik telah berjaya dikumpul dalam program tersebut. Kempen ini bertujuan meningkatkan kesedaran dan kefahaman orang awam mengenai sistem pengurusan buangan peralatan elektrik dan elektronik (e-waste) di Malaysia. Kempen tersebut turut disertai oleh Agensi-agensi Kerajaan Persekutuan dan Negeri, Institusi Pengajian Tinggi Awam dan Swasta, Sekolah, industri dan orang awam. Selain di Metro City Matang, Kuching, Kempen Pengumpulan Buangan Elektrikal Dan Elektronik turut diadakan dalam program pada hari ini dan turut dirancang untuk dilaksanakan di:
 - i. Bahagian Bintulu pada 7 hingga 8 November 2020.
- d. Bengkel Promosi Sekolah Lestari – Anugerah Alam Sekitar (SLAAS) di Bahagian Kuching yang dicadangkan pada 12 November 2020 dengan kerjasama Jabatan Pendidikan Negeri Sarawak. Program SLAAS bertujuan membentuk persekitaran sekolah yang menitikberatkan pemeliharaan dan pemuliharaan alam sekitar dalam aspek pengurusan, kurikulum, kokurikulum dan penghijauan.

PENGHARGAAN DAN HARAPAN

8. Akhir kata, saya sekali lagi ingin merakamkan ucapan terima kasih dan syabas kepada semua pihak yang terlibat dalam menjayakan penganjuran program hari ini dan berharap ianya dijadikan acara tahunan dan diteruskan. Semoga melalui program sebegini, inisiatif menangani isu-isu alam sekitar dan kesedaran alam sekitar dapat ditingkatkan dalam usaha kita bagi memulihara dan melindungi alam sekitar untuk generasi masa kini dan akan datang.

Sekian, wabillahi taufik wal hidayah assalamualaikum w.b.t.